

四庫全書

集部

欽定四庫全書

集部

御定全唐詩錄卷六十二

詳校官左中允<sub>臣</sub> 璿五珠

主事銜<sub>臣</sub> 徐以坤覆勘

總校官原任中允<sub>臣</sub> 王燕緒

校對官中書<sub>臣</sub> 田尹衡

謄錄監生<sub>臣</sub> 馮堪

謄錄監生<sub>臣</sub> 龐兆懋

欽定四庫全書

御定全唐詩錄卷六十二

白居易

五

古體詩

五

醉後走筆酬劉五主簿長句之贈兼簡張大賈二

十四先輩昆季

劉兄丈高行孤立十五年前名翕習是時相遇在符離  
我年二十君三十得意忘年心迹親寓居同縣日知聞

衡門寂寞朝尋我古寺蕭條暮訪君朝來暮去多攜手  
窮巷貧居何所有秋燈夜寫聯句詩春雪朝傾煖寒酒  
俾湖綠愛白鷗飛灘水清憐紅鯉肥偶語閒攀芳樹立  
相扶醉躡落花歸張賈弟兄同里巷乘閒數數來相訪  
雨天連宿草堂中月夜徐行石橋上我年漸長忽自驚  
鏡中冉冉髭鬚生心畏後時同勵志身牽前事各求名  
問我棲棲何所適鄉人薦為鹿鳴客二千里外謝交遊  
三十韻詩慰行役出門可憐惟一身弊裘瘦馬入咸秦

夔夔街鼓紅塵闇晚到長安無主人二賈二張與余弟  
驅車灑迤來相繼操詞握賦為干戈鋒銳森然勝氣多  
同入文場多苦戰五人十載九登科二張得雋名居甲  
美退爭雄重告捷棠棣輝榮並桂枝芝蘭芬馥如荆葉  
惟有沅犀屈未伸握中自謂駭鷄珍三年不鳴鳴必大  
豈獨駭鷄當駭人元和運氣千年聖同遇明時余最幸  
始辭秘閣吏王畿遽列諫垣升禁闈蹇步何堪鳴珮玉  
衰容不稱着朝衣闔闔晨開朝百辟冕旒不動香煙碧

步登龍尾上虛空立去天顏無咫尺宮花似雪從乘輿  
禁月如霜坐直廬身賤每驚隨內宴才微常媿草天書  
晚松寒竹新昌第職居密近門多閉日暮銀臺下直回  
故人到門門暫開回頭下馬一相顧塵土滿衣何處來  
斂手炎涼叙未畢先說舊山今悔出岐陽旅宦少歡娛  
江左遷遊費時日贈我一篇行路吟吟之句句披沙金  
歲月徒催白髮貌泥塗不屈青雲志誰謂茫茫天地意  
短才獲用長才棄我隨鷓鴣入煙雲謬上丹墀為近臣

君同鸞鳳棲荆棘猶着青袍作選人惆悵知賢不能薦  
徒為出入蓬萊殿月慙諫紙二百張歲媿俸錢三十萬  
大抵浮榮何足道幾度相逢即身老且傾斗酒慰羈愁  
重諾符離問舊遊北巷鄰居幾家去東林舊院何人住  
武里村花落復開流溝山色應如故感此酬君千字詩  
醉中分手又何之須知通塞尋常事莫歎浮沉先後時  
慷慨臨岐重相勉殷勤別後加餐飯君不見買臣衣錦  
還故鄉五十身榮未為晚

江南遇天寶樂叟

白頭老叟泣且言，祿山未亂入梨園。  
能彈琵琶和法曲，多在華清隨至尊。  
是時天下太平久，年年十月坐朝元。  
千官起居環珮合，萬國會同車馬奔。  
金殿照耀石甕寺，蘭麝熏煮溫湯源。  
貴妃宛轉侍君側，體弱不勝珠翠繁。  
冬雪飄颻錦袍暖，春風蕩漾霓裳翻。  
歡娛未足燕寇至，弓勁馬肥戎語喧。  
幽土人遷避，獯鬻鼎湖龍去哭軒轅。  
從此漂淪到南土，萬人死盡一身存。  
秋風江上浪無限。



暮雨舟中酒一樽  
涸魚久失風波勢  
枯草曾沾雨露恩  
我自秦來君莫問  
驪山渭水如荒邨  
新豐樹老籠明月  
長生殿閣鎖春雲  
紅葉紛紛蓋歌瓦  
綠苔重重封壞垣  
唯有中官作宮使  
每年寒食一開門

送張山人歸嵩陽

黃昏慘慘天微雪  
修行坊西鼓聲絕  
張生馬瘦衣且單  
夜叩柴門與我別  
媿君冒寒來別我  
為君沽酒張燈火  
酒酣火暖與君言  
何事出關又入關  
答云前年偶下山

四十餘月客長安長安古來名利地空手無金行路難  
朝遊九城陌肥馬輕車欺殺客暮宿五侯門殘茶冷酒  
愁殺人春明門門前便是嵩山路幸有雲泉容此身明  
日辭君且歸去

放旅雁

九江十年冬大雪江水生冰樹枝折百鳥無食東西飛  
中有旅雁聲最饑雪中啄草冰上宿翅冷騰空飛動遲  
江童持網捕將去手攜入市生賣之我本北人今謫謫

人鳥雖殊同是客見此客鳥傷客人贖汝放汝飛入雲  
雁雁汝飛向何處第一莫飛西北去淮西有賊討未平  
百萬甲兵久屯聚官軍賊軍相守老食盡兵窮將及汝  
健兒饑餓射汝喫拔汝翅翎為箭羽

畫竹歌

并序

協律郎蕭悅善畫竹舉時無倫蕭亦甚自秘重  
有終歲求其一竿一枝而不得者知予天與好  
事忽寫一十五竿惠然見投予厚其意高其藝

無以答賦作歌以報之凡一百八十六字云

植物之中竹難寫古今雖畫無似者蕭郎下筆獨逼真  
丹青以來惟一人人畫竹身肥擁腫蕭畫莖瘦節節疎  
人畫竹梢死羸垂蕭畫枝活葉葉動不根而生從意生  
不笋而成由筆成野塘水邊碕岸側森森兩叢十五莖  
嬋娟不失筠粉態蕭颯盡得風煙情舉頭忽看不似畫  
低耳靜聽疑有聲西叢七莖勁而健省向天竺寺前石  
上見東叢八莖疎且寒曾憶湘妃廟裏雨中看幽姿遠

思少人別與君相顧空長歎蕭郎蕭郎老可惜手顫眼  
昏頭雪色自言便是絕筆時從今此竹猶難得

長恨歌

漢王重色思傾國御宇多年求不得楊家有女初長成  
養在深閨人未識天生麗質難自棄一朝選在君王側  
回頭一笑百媚生六宮粉黛無顏色春寒賜浴華清池  
溫泉水滑洗凝脂侍兒扶起嬌無力始是新承恩澤時  
雲鬢花顏金步搖芙蓉帳暖度春宵春宵苦短日高起

從此君王不早朝承歡侍宴無閒暇春從春遊夜轉夜  
後宮佳麗三千人三千寵愛在一身金屋敎成嬌侍夜  
玉樓宴罷醉和春姊妹兄弟皆列土可憐光彩生門戶  
遂令天下父母心不重生男重生女驪宮高處入青雲  
仙樂風飄處處聞緩歌漫舞凝絲竹盡日君王看不足  
漁陽鞞鼓動地來驚破霓裳羽衣曲九重城闕煙塵生  
千乘萬騎西南行翠華搖搖行復止西出都門百餘里  
六軍不發無奈何宛轉蛾眉馬前死花鈿委地無人收

翠翹金雀玉搔頭。君王掩面救不得。回首血淚相和流。  
黃埃散漫風蕭索。雲棧縈紆登劍閣。峨眉山下少人行。  
旌旗無光日色薄。蜀江水碧蜀山青。聖主朝朝暮暮情。  
行宮見月傷心色。夜雨聞鈴腸斷聲。天旋地轉迴龍馭。  
到此躊躇不能去。馬嵬坡下泥土中。不見玉顏空死處。  
君臣相顧盡沾衣。東望都門信馬歸。歸來池苑皆依舊。  
太液芙蓉未央柳。芙蓉如面柳如眉。對此如何不淚垂。  
春風桃李花開日。秋雨梧桐葉落時。西宮南苑多秋草。

落葉滿階紅不掃梨園弟子白髮新椒房阿監青娥老  
夕殿螢飛思悄然孤燈挑盡未成眠遲遲鐘鼓初長夜  
耿耿星河欲曙天鴛鴦瓦冷霜華重翡翠衾寒誰與共  
悠悠生死別經年魂魄不曾來入夢臨邛道士鴻都客  
能以精誠致魂魄為感君王展轉思遂教方士慙慙覓  
排空馭氣奔如電升天入地求之遍上窮碧落下黃泉  
兩處茫茫皆不見忽聞海上有仙山山在虛無縹緲間  
樓閣玲瓏五雲起其中綽約多仙子中有一人字太真



雪膚花貌參差是金闕西廂叩玉扃轉教小玉報雙成  
聞道漢家天子使九華帳裏夢魂驚攬衣推枕起徘徊  
珠箔銀屏邈迤開雲鬢半偏新睡覺花冠不整下堂來  
風吹仙袂飄飄舉猶似霓裳羽衣舞玉容寂寞淚闌干  
梨花一枝春帶雨含情凝睇謝君王一別音容兩渺茫  
昭陽殿裏恩愛絕蓬萊宮中日月長回頭下望人寰處  
不見長安見塵霧惟將舊物表深情鈿合金釵寄將去  
釵留一股合一扇釵擘黃金合分鈿但令心似金鈿堅

天上人間會相見臨別殷勤重寄詞詞中有誓兩心知  
七月七日長生殿夜半無人私語時在天願作比翼鳥  
在地願為連理枝天長地久有時盡此恨綿綿無絕期

琵琶引

并序

元和十年予左遷九江郡司馬明年秋送客湓  
浦口聞舟中夜彈琵琶者聽其音錚錚然有京  
都聲問其人本長安娼女嘗學琵琶於穆曹二  
善才年長色衰委身為賈人婦遂命酒使快彈

數曲曲罷憫然自叙少小時歡樂事今漂淪憔悴轉徙於江湖間予出官二年恬然自安感斯人言是夕始覺有遷謫意因為長句歌以贈之  
凡六百一十二言命曰琵琶行

潯陽江頭夜送客楓葉荻花秋瑟瑟主人下馬客在船  
舉酒欲飲無管絃醉不成歡慘將別別時茫茫江浸月  
忽聞水上琵琶聲主人忘歸客不發尋聲闇問彈者誰  
琵琶聲停欲語遲移船相近邀相見添酒回燈重開宴

千呼萬喚始出來猶抱琵琶半遮面轉軸撥絃三兩聲  
未成曲調先有情絃絃掩抑聲聲思似訴平生不得志  
低眉信手續續彈說盡心中無限事輕攏慢撚乃殄切抹  
復挑初為霓裳後六么大絃嘈嘈如急雨小絃切切如  
私語嘈嘈切切錯雜彈大珠小珠落玉盤間闕鶯語花  
底滑幽咽泉流水下灘水泉冷澁絃凝絕凝絕不通聲  
暫歇別有幽愁闇恨生此時無聲勝有聲銀瓶乍破水  
漿迸鐵騎突出刀槍鳴曲終收撥當心畫四絃一聲如

裂帛東船西舫悄無言唯見江心秋月白  
沉吟放撥插絃中整頓衣裳起斂容  
自言本是京城女家在蝦蟆陵  
下住十三學得琵琶成名屬教坊  
第一部曲罷長教善才服粧成  
每被秋娘妬五陵年少爭纏頭  
一曲紅綃不知數鈿頭銀篦擊  
節碎血色羅裙翻酒污今年歡  
笑復明年秋月春風等閒度弟  
走從軍阿姨死暮去朝來顏  
色故門前冷落鞍馬稀老大嫁  
作商人婦商人重利輕別離前  
月浮梁買茶去去來江口守空  
船遶船明月江

水寒夜深忽夢少年事夢啼粧淚紅闌干我聞琵琶已  
歎息又聞此語重唧唧同是天涯淪落人相逢何必曾  
相識我從去年辭帝京謫居卧病潯陽城潯陽地僻無音  
樂終歲不聞絲竹聲住近湓江地低濕黃蘆苦竹遶宅  
生其間旦暮聞何物杜鵑啼血猿哀鳴春江花朝秋月  
夜往往取酒還獨傾豈無山歌與邛苐嘔啞嘲哢難為  
聽今夜聞君琵琶語如聽仙樂耳暫明莫辭更坐彈一  
曲為君翻作琵琶行感我此言良久立却坐促絃絃轉

急淒淒不似向前聲滿座重聞皆掩泣座中泣下誰最  
多江州司馬青衫濕

簡簡吟

蘇家小女名簡簡芙蓉花腮柳葉眼十一把鏡學點粧  
十二抽針能繡裳十三行坐事調品不肯迷頭白地藏  
玲瓏雲髻生花樣飄飄風袖薔薇香殊姿異態不可狀  
忽忽轉動如有光二月繁霜殺桃李明年欲嫁今年死  
丈人阿母勿悲啼此女不是凡夫妻恐是天仙謫人世

只合人間十三歲大都好物不堅牢綵雲易散琉璃脆

霓裳羽衣歌

和微之

我昔元和侍憲皇曾陪內宴宴昭陽千歌百舞不可數

就中最愛霓裳舞舞時寒食春風天玉鉤欄下香案前

案前舞者顏如玉不着人家俗衣服虹裳霞帔步搖冠

鈿璫累累佩珊珊娉婷似不任羅綺顧聽樂懸行復止

磬蕭箏笛遞相攬擊手擗彈吹聲灑迤

凡法曲之初衆樂不齊惟金石絲竹

次第發聲霓裳

序初亦復如此散序六奏未動衣陽臺宿雲慵不飛

散序



六遍無拍  
故不舞也

中序擘騫

霍說切

初入拍秋竹竿裂春冰折

中序

始有拍亦名拍序

飄然轉旋迴雪輕  
嫣然縱送游龍驚  
小垂手

後柳無力斜曳裾  
時雲欲生

四句皆霓裳舞之初態

煙蛾斂略不

勝態風袖低昂如有情  
上元點鬟招萼綠  
王母揮袂別

飛瓊繁音急節十二遍  
跳珠撼玉何鏗錚

霓裳曲十遍而終翔

鸞舞了却收翅唳鶴曲  
終長引聲

凡曲將畢皆聲拍促速惟霓裳之末長引

一聲也

當時乍見驚心目  
凝視諦聽殊未足  
一落人間八

九年耳冷不曾聞  
此曲湓城但聽山魃語  
巴峽惟聞杜

鵲哭

予自江州司馬  
轉忠州刺史

移領錢塘第二年始有心情問絲

竹玲瓏笙篔篹謝好箏陳寵感策沈平笙清絃脆管纖纖

手教得霓裳一曲成

自玲瓏以下  
皆杭之妓名

虛白亭前湖水畔前

後祇應三度按便除庶子拋却來聞道如今各星散今

年五月至蘇州朝鐘暮角催白頭貪看案牘常侵夜不

聽笙歌直到秋秋來無事多閒悶忽憶霓裳無處問聞

君部內多樂徒問有霓裳舞者無答云十縣十萬戶無

人知有霓裳舞惟寄長歌與我來題作霓裳羽衣譜四

幅花牋碧間紅霓裳實錄在其中千姿萬狀分明見恰  
與昭陽舞者同眼前彷彿覩形質昔日今朝想如一疑  
從魂夢呼召來似着丹青圖寫出我愛霓裳君合知發

於歌詠形於詩君不見我歌云驚破霓裳羽衣曲

長恨歌云

又不見我詩云曲愛霓裳未拍時

錢塘詩云

由來能事皆有

主揚氏創聲君造譜

開元中西涼府節度楊敬述造

君言此舞難得人

須是傾城可憐女吳妖小玉飛作煙

夫差女小玉死後形見於王其母抱

之霏微若烟霧散空越艷西施化為土嬌花巧笑久寂寥娃館亭

蘿空處所如君所言誠有是君試從容聽我語若求國色  
始翻傳但恐人間廢此舞妍媸優劣寧相遠大都只在  
人擡舉李娟張態君莫嫌亦擬隨宜且教取娟態蘇  
妓之名

小童薛陽陶吹簫歌

和浙西李  
大夫作

剪削乾蘆插寒竹九孔漏聲五音足近來吹者誰得名  
關雎老死李衮生衮今又老誰其嗣薛氏樂童年十二  
指點之下師授聲含嚼之間天與氣潤州城高霜月明  
吟霜思月欲發聲山頭江底何悄悄猿聲不喘魚龍聽

翕然聲作疑管裂  
訕然聲盡疑刀截  
有時婉軟無筋骨  
有時頓挫生稜節  
急聲圓轉促不斷  
驟驟麟麟似珠貫  
緩聲展引長有條  
有條直直如筆描  
乍墜石沉重  
高聲忽舉雲飄蕭  
明旦公堂陳宴席  
主人命樂娛賓客  
碎絲細竹徒紛紛  
宮調一聲雄出羣  
衆音覩即何切縷不  
落道有如部伍隨  
將軍嗟爾陽陶方  
稚齒下手發聲已  
如此若教頭白吹  
不休但恐聲名壓  
關李

舒負外遊香山寺數日不歸兼辱尺書大誇勝事

時正值坐衙慮囚之際走筆題長句以贈之

香山石樓倚天開翠屏壁立波環迴黃菊繁時好客到

碧雲合處佳人來

謂遺英舊二妓  
與舒君同遊

酡顏一笑天桃綻清

吟數聲寒玉哀軒騎逶遲棹容與留連三日不能迴白  
頭老尹府中坐早衙纔退暮衙催庭前堦上何所有纍  
囚成貫案成堆豈無池塘長秋草亦有絲竹生塵埃今  
日清光昨夜月竟無人來勸一杯

蘇州李中丞以元日郡齋感懷詩寄微之及余輒

依來篇七言八韻走筆奉答兼呈微之

白首餘杭白太守落魄拋名來已久一辭渭北故園春  
再把江南新歲酒杯前笑歌徒勉強鏡裏形容漸衰朽  
領郡慙當潦倒年隣州喜得平安友長洲草接松江岸  
曲水花連鏡湖口老去還能痛飲無春來曾作閒遊否  
憑鶯傳語報李六倩雁將書與元九莫嗟一日日催人  
且貴一年年入手

秋日與張賓客舒著作同遊龍門醉中狂歌凡二

百三十八字

秋天高高秋光清秋風嫋嫋秋蟲鳴嵩峯餘霞錦綺卷  
伊水細浪鱗甲生洛陽閒客知無數少出遊山多在城  
商嶺老人自追逐蓬丘逸士相逢迎南出鼎門十八里  
莊店邈迤橋道平不寒不熱好時節鞍馬穩快衣衫輕  
並轡踟躕下西岸扣舷容與遶中汀開懷曠達無所繫  
觸目勝絕不可名荷衰欲黃荇猶綠魚樂自躍鷗不驚  
翠藻蔓長孔雀尾彩船櫓急寒雁聲家醞一壺白玉液



野花數把黃金英，晝遊四看西日暮。  
夜話三及東方明，暫停杯觴輒吟詠。  
我有狂言君試聽，丈夫一生有二志。  
兼濟獨善難得并，不能救療生民病。  
即須先濯塵土纓，况我頭白眼已闇。  
終日戚促何所成，不如展眉開口笑。  
龍門醉卧香山行

達哉樂天行

達哉達哉白樂天，分司東都十三年。  
七旬纔滿冠已挂，半祿未及車先懸。  
或伴遊客春行樂，或隨山僧夜坐禪。

二年忘却問家事門庭多草廚少煙庖童朝告鹽米盡  
侍婢暮訴衣裳穿妻孥不悅甥姪悶而我醉卧方陶然  
起來與爾畫生計薄產處置有後先先賣南方十畝園  
次賣東郭五頃田然後兼賣所居宅髣髴獲緡二三千  
半與爾充衣食費半與吾供酒肉錢吾今已年七十一  
眼昏鬚白頭風眩但恐此錢用不盡即先朝露歸夜泉  
未歸且住亦不惡饑食樂飲安穩眠死生無可無不可  
達哉達哉白樂天

海漫漫 戒求仙也

海漫漫直下無底傍無邊雲濤煙浪最深處人傳中有  
三神山山上多生不死藥服之羽化為天仙秦皇漢武  
信此語方士年年採藥去蓬萊今古但聞名煙水茫茫  
無覓處海漫漫風浩浩眼穿不見蓬萊島不見蓬萊不  
敢歸童男艸女舟中老徐福文成多誑誕上元太一虛  
祈禱君看驪山頂上茂陵頭畢竟悲風吹蔓草何況玄  
元聖祖五千言不言藥不言仙不言白日昇青天

華原磬

刺樂工非其人也

天寶中始廢泗濱磬用華原石代之詢諸

磬人則曰故老云泗濱磬下調之不能和得華原石考之乃和由是不改

華原磬華原磬古人不聽今人聽泗濱石泗濱石今人不擊古人擊今人古人何不同用之捨之由樂工樂工雖在耳如壁不分清濁即為聾梨園弟子調律呂知有新聲不如古古稱浮磬出泗濱立辨致死聲感人宮懸一聽華原石君心遂忘封疆臣果然寇亂從燕起武臣少官封疆死始知樂與時政通豈聽鏗鏘而已矣磬襄

入海去不歸長安市人為樂師華原磬與泗濱石清濁  
兩聲誰得知

上陽白髮人 愍怨曠也

天寶五載已後楊貴妃  
專寵後宮人無復進幸

美六宮有美色者輒置別所上  
陽是其一也貞元中尚存焉

上陽人紅顏闇老白髮新綠衣監使守宮門一閉上陽  
多少春明皇末歲初選入入時十六今六十同時采擇  
百餘人零落年深殘此身憶昔吞悲別親族扶入車中  
不敢哭皆云入內便承恩臉似芙蓉骨似玉未容君王

得見面已被楊妃遙側目  
妬令潛配上陽宮  
一生遂向空房宿  
宿空房  
秋夜長  
夜長無寐  
天不明  
耿耿殘燈照背影  
蕭蕭閣雨打窗聲  
春日遲日遲  
獨坐天難暮  
宮鶯百轉愁  
厭聞梁燕雙栖老  
休妬鶯歸燕去長  
悄然春往秋來不  
記年  
惟向深宮望  
明月東西四五百迴圓  
今日宮中年  
最老  
大家遙賜尚書號  
小頭鞋履窄衣裳  
青黛點眉  
細長  
外人不見見應笑  
天寶末年時世粧  
上陽人苦最  
多少亦苦老亦苦  
少苦老苦兩如何  
君不見昔時呂尚

美人賦

天寶未有密米艷色者當時號花鳥使呂尚獻美人賦以諷之

又不見今日上

陽白髮歌

胡旋女

戒近習也

天寶末康居國獻之

胡旋女胡旋女心應絃手應鼓絃鼓一聲雙袖舉迴雪

飄颻轉蓬舞左旋右轉不知疲千匝萬周無已時人間

物類無可比奔車輪緩旋風遲曲終再拜謝天子天子

為之微啟齒胡旋女出康居徒勞東來萬里餘中原自

有胡旋者鬪妙爭能爾不如天寶季年時欲變臣妾人

人學圓轉中有太真外祿山二人最道能胡旋梨花園  
中冊作妃金鷄障下養為兒祿山胡旋迷君眼兵過黃  
河疑未反貴妃胡旋感君心死棄馬鬼念更深從茲地  
軸天維轉五十年来制不禁胡旋女莫空舞數唱此歌  
悟明主

新豐折臂翁 戒邊功也

新豐老人八十八頭髮眉鬚皆似雪玄孫扶向店前行  
左臂憑肩右臂折問翁臂折來幾年兼問致折何因緣



翁云貫屬新豐縣生逢聖代無征戰慣聽梨園歌管聲  
不識旗槍與弓箭無何天寶大徵兵戶有三丁點一丁  
點得驅將何處去五月萬里雲南行聞道雲南有瀘水  
椒花落時瘴煙起大軍徒涉水如湯未過十人二三死  
村南村北哭聲哀兒別爺娘夫別妻皆云前後征蠻者  
千萬人行無一迴是時翁年二十四兵部牒中有名字  
夜深不敢使人知偷將大石鎚折臂張弓簸旗俱不堪  
從茲始免征雲南骨碎筋傷非不苦且圖揀退歸鄉土

此臂折來六十年一肢雖廢一身全至今風雨陰寒夜

直到天明痛不眠痛不眠終不悔且喜老人今獨在不

然當時瀘水頭身死魂飛骨不收應作雲南望鄉鬼萬

人塚上哭叻叻

雲南有萬人塚即鮮于仲通李密曾覆軍之所今塚猶存

老人言君

聽取君不聞開元宰相宋開府不賞邊功防黷武

開元初突

厥數寇邊時天武軍牙將郝靈佺出使因引特勒回鶻

部落斬突厥默啜獻首于闕下自謂有不世之功時宋

環為相以天子年少好武恐微功者生心痛抑  
其賞逾年始授郎將靈佺遂慟哭嘔血而死 又不聞  
天寶宰相楊國忠欲求恩幸立邊功邊功未立生人怨

請問新豐折臂翁

天寶末楊國忠為相重結閣羅鳳之後募人討之前後發二十餘萬衆去

無返者又捉人連枷赴役天下怨哭人不聊生故祿山得乘人心而盜天下元和初而折臂翁猶存因備歌之

縛戎人 達窮民之情也

縛戎人縛戎人口穿面破驅入秦天子矜憐不忍殺詔  
徙東南吳與越黃衣小使錄姓名領出長安乘遮行身  
被金瘡面多瘡扶病徒行日一驛朝食饑渴費杯盤夜  
卧腥臊汚牀席忽逢江水憶交河垂手齊聲嗚咽歌其  
中一虜語諸虜爾苦非多我苦多同伴行人因借問欲

說喉中氣憤憤自云鄉管本涼原大厯年中沒落蕃一  
落蕃中四十載身著皮裘繫毛帶惟許正朝服漢儀歛  
衣整巾潛淚垂誓心密定歸鄉計不使蕃中妻子知

李有

如暹者蓬子將軍之子也嘗沒蕃中自云蕃法惟正歲一  
日許唐人之沒蕃者服唐衣冠由是悲不自勝定歸計

也 暗思自有殘筋骨更恐年衰歸不得蕃侯嚴兵鳥不

飛脫身冒死奔逃歸晝伏宵行經大漠雲陰月黑風沙  
惡驚藏青塚寒草踈偷渡黃河夜水薄忽聞漢軍鼙  
鼓聲路旁走出再拜迎游騎不聽能漢語將軍遂縛作

蕃生配向東南卑濕地定無存卹空防備念此吞聲仰  
訴天若為辛苦度殘年涼原鄉井不得見胡地妻兒虛  
棄捐沒蕃被囚思漢土歸漢被劫為蕃虜早知如此悔歸  
來兩地寧如一處苦縛戎人戎人之中我苦辛自古此  
冤應未有漢心漢語吐蕃身

百鍊鏡 美皇王鑒也

百鍊鏡鎔範非常規日辰處所靈且祇江心波上舟中  
鑄五月五日日午時瓊粉金膏磨瑩已化為一片秋潭

水鏡成將獻蓬萊宮揚州長史手自封人間臣妾不合  
照背有九五飛天龍人人呼為天子鏡我有一言聞太  
宗太宗常以人為鏡鑒古鑒今不鑒容四海安危居掌  
內百王治亂懸其中乃知天子別有鏡不是揚州百鍊  
銅

青石 激忠烈也

青石出自藍田山兼車運載來長安工人磨琢欲何用  
石不能言我代言不願作人家墓前神道碣墳土未乾

名已滅不願作官家道傍德政碑不鐫實錄鐫虛辭願  
為顏氏段氏碑雕鏤太尉與太師刻此兩片堅金質狀  
彼二人忠烈姿義心若石屹不轉死節名流確不移如  
觀奮擊朱泚日似見叱呵希烈時各於其上題名諡一  
置高山一沉水陵谷雖遷碑獨存骨化為塵名不死長  
使不忠不烈臣觀碑改節慕為人慕為人勸事君

西涼伎 刺封疆之臣也

西涼伎假面胡人假獅子刻木為頭絲作尾金鍍眼睛

銀帖齒奮迅毛衣擺雙耳如從流沙來萬里紫髯深目  
兩胡兒鼓舞跳梁前致辭應似涼州未陷日安西都護  
進來時須臾云得新消息安西路絕歸不得泣向獅子  
涕雙垂涼州陷沒知不知獅子回頭向西望哀吼一聲  
觀者悲貞元邊將愛此曲醉坐笑看看不足享賓犒士  
宴三軍獅子胡兒長在目有一征夫年七十見弄涼州  
低面泣泣罷斂手白將軍主憂臣辱昔所聞自從天寶  
兵戈起邊戎日夜吞西鄙涼州陷來四十年河隴侵將



七千里平時安西萬里疆今日邊防在鳳翔

平時開遠門外立堠

云去安西九千九百里以示戍人不為萬里行  
其實就盈數也今蕃漢使往來悉在隴州交易緣邊空

屯十萬卒飽食溫衣閒過日遺民腸斷在涼州將卒相  
看無意收天子每思常痛惜將軍欲說合慙羞奈何仍  
看西涼伎取笑資歡無所愧縱無智力未能收忍取西  
涼弄為戲

八駿圖 戒竒物懲佚遊也

穆王八駿天馬駒後人愛之寫為圖背如龍兮頸如象

骨竦筋高肌肉壯日行萬里速如飛穆王獨乘何所之  
四荒八極躅欲遍三十二蹄無歇時屬車軸折赴不及  
黃屋草生棄若遺瑤池西赴王母宴七廟經年不親薦  
璧臺南與盛姬遊明堂不復朝諸侯白雲黃竹歌聲動  
一人荒樂萬人愁周從后稷至文武積德累功世勤苦  
豈知纜及四代孫心輕王業如灰土由來尤物不在大  
能蕩君心則為害文帝却之不肯乘千里馬去漢道興  
穆王得之不為戒八駿駒來周室壞至今此物世稱珍

不知房星之精下為害八駿圖君莫愛

澗底松 念寒雋也

有松百尺大十圍生在澗底寒且卑澗深山險人路絕  
老死不逢工度之天子明堂欠梁木此求彼有兩不知  
誰諭蒼蒼造物意但與之材不與地金張世祿原憲貧  
牛衣寒賤貂蟬貴貂蟬與牛衣高下雖有殊高者未必  
賢下者未必愚君不見沉沉海底生珊瑚歷歷天上種

白榆

繚綾 念女工之勞也

繚綾繚綾何所似不似羅綃與紈綺應似天台山上明月前四十五尺瀑布泉中有文章又竒絕地鋪白煙花簇雪織者何人衣者誰越溪寒女漢宮姬去年中使宣口敕天上取樣人間織織為雲外秋雁行染作江南春水色廣裁衫袖長製裙金斗尉尖波刀剪紋異彩竒文相隱映轉側看花看不定昭陽舞人恩正深春衣一對直千金汗沾粉汙不再着曳土蹋泥無惜心繚綾織成費

功績莫比尋常繒與帛絲細線多女手疼扎扎千聲不  
盈尺昭陽殿裏歌舞人若見織時應也惜

賣炭翁 苦官市也

賣炭翁伐薪燒炭南山中滿面塵灰烟火色兩鬢蒼蒼  
十指黑賣炭得錢何所營身上衣裳口中食可憐身上  
衣正單心憂炭賤願天寒夜來城外一尺雪曉駕炭車  
輾水轍牛困人饑日已高市南門外泥中歇翩翩兩騎  
來是誰黃衣使者白衫兒手把文書口稱敕迴車叱牛

率向北一車炭重千餘斤官使驅將惜不得半足紅紗  
一丈綾繫向牛頭充炭直

官牛 諷執政也

官牛官牛駕官車漉水岸邊搬載沙一石沙幾斤重朝  
載暮載將何用載向五門官道西綠槐陰下鋪沙堤昨  
來新拜右丞相恐怕泥塗汙馬蹄右丞相馬蹄踏沙雖  
淨潔牛領牽車欲流血右丞相但能濟人治國調陰陽  
官牛領穿亦不妨

秦吉了 哀寃民也

秦吉了出南中彩毛青黑花頸紅耳聰心慧舌端巧鳥  
語人言無不通昨日長爪鳶今日大背烏鳶指乳燕一  
窠覆烏啄母鷄雙眼枯鷄號墮地燕驚去然後拾卵攫  
其雛豈無鵬與鷄音素中食飽不宥搏亦有鸞鶴羣間  
立颺高如不聞秦吉了人云爾是能言鳥豈不見鷄燕  
之寃苦吾聞鳳凰百鳥主爾竟不為鳳凰之前致一言

安用噪噪閒言語

真娘墓

墓在虎丘寺

真娘墓虎丘道不識真娘鏡中面惟見真娘墓頭草霜  
摧桃李風折蓮真娘死時猶少年脂膚漢手不牢固世  
間有物難留連難留連易消歇塞北花江南雪

寒食野望吟

丘墟郭門外寒食誰家哭風吹曠野紙錢飛古墓纍纍  
春草綠棠梨花映白楊樹盡是死生離別處冥漠重泉  
哭不聞蕭蕭暮雨人歸去



醉歌

示妓人  
商玲瓏

罷胡琴掩秦瑟玲瓏再拜歌初畢誰道使君不解歌聽  
唱黃鷄與白日黃鷄催曉丑時鳴白日催年酉時沒腰  
間紅綬繫未穩鏡裏朱顏看已失玲瓏玲瓏奈老何使  
君歌了汝更歌

憶舊遊

寄劉  
蘇州

憶舊遊舊遊安在哉舊遊之人半白首舊遊之地多蒼  
苔江南舊遊凡幾處就中最憶吳江隈長洲苑綠柳萬

樹齊雲樓春酒一杯闔門曉嚴旗鼓出臯橋夕開船舫  
迴修蛾慢臉燈下醉急管繁絃頭上催六七年前狂爛  
漫三千里外思徘徊李娟張態一春夢周五殷三歸夜  
臺虎丘月色為誰好娃宮花枝應自開賴得劉郎解吟

咏江山氣色合歸來

娟態蘇州妓名  
周殷蘇州從事

履信池櫻桃島上醉後走筆送別舒負外兼寄宗

正李卿考功崔郎中

櫻桃島前春去春花萬枝忽憶與宗卿閒飲日又憶與

考功狂醉時歲晚無花空有葉風吹滿地乾重叠蹋葉  
悲秋復憶春池邊樹下重殷勤今朝一酌臨寒水此地  
三迴別故人櫻桃花來春千萬朶來春共誰花下坐不  
論崔李上青雲明日舒三亦拋我

御定全唐詩錄卷六十二

欽定四庫全書

御定全唐詩錄卷六十三

白居易六

近體詩一

社日關路作

晚景函關路涼風社日天青巖新有燕紅樹欲無蟬  
愁立驛樓上厭行官堠前蕭條秋興苦漸近二毛年

賦得古原草送別

離離原上草一歲一枯榮  
野火燒不盡春風吹又生  
遠芳侵古道晴翠接荒城  
又送王孫去萋萋滿別情

旅次景空寺宿幽上人院

不與人境接寺門開向山  
暮鐘鳴鳥聚秋雨病僧閒  
月隱雲樹外螢飛廊宇間  
幸投花界宿暫得靜心顏

秋暮郊居書懷

郊居人事少晝卧對林巒  
窮巷厭多雨貧家愁早寒  
葛衣秋未換書卷病仍看  
若問生涯計前溪一釣竿

客中守歲

在柳  
家莊

守歲樽無酒思鄉淚滿巾始知為客苦不及在家貧畏  
老偏驚節防愁預惡春故園今夜裏應念未歸人

涼夜有懷

念別感時節早蛩聞一聲風簾夜涼入露草秋意生燈  
盡夢初罷月斜天未明閣凝無限思起傍藥欄行

夜坐

斜月入前楹迢遙夜坐情梧桐上階影蟋蟀近牀聲曙

傍窓閒至秋從簟上生感時因憶事不寢到雞鳴

江夜舟行

煙澹月濛濛舟行夜色中江鋪滿槽水帆展半檣風叫  
曙嗷嗷雁啼秋唧唧蟲只應催北客早作白鬚翁

途中感秋

節物行搖落年顏坐變衰樹初黃葉日人欲白頭時鄉  
國程程遠親朋處處辭惟憐病與老一步不相離

江樓偶宴贈同座



南浦閒行罷西樓小宴時望湖凭檻久待月放杯遲江  
果嘗盧橘山歌聽竹枝相逢且同樂何必舊相知

櫻桃花下歎白髮

逐處花皆好隨年貌自衰紅櫻滿眼日白髮半頭時倚  
樹無言久攀條欲放遲臨風兩堪歎如雪復如絲

官舍閒題

職散優閒地身慵老大時送春惟有酒銷日不過棋祿  
米麋牙稻園蔬鴨脚葵飽餐晨晏起餘暇弄龜兒

龜兒即小

名姪

清明送韋侍郎貶虔州

寂寞清明日蕭條司馬家  
留飭和冷粥出火煮新茶  
欲別能無酒相留亦有花  
南遷更何處此地已天涯

東亭閣望

東亭盡日坐誰伴  
寂寥身綠桂為佳客  
紅蕉當美人笑  
言雖不接情狀似相親  
不作悠悠想如何度晚春

中書夜直夢忠州

閣下燈前夢巴南城裏遊覓花來渡口尋寺下山頭江  
色分明綠猿聲依舊愁禁鐘驚睡覺惟不上東樓

暮歸

不覺百年半何曾一日閒朝隨燭影出暮趁鼓聲還甕  
裏非無酒牆頭亦有山歸來常困卧早晚得開顏

久不見韓侍郎戲題四韻以寄之

近來韓閣老疎我我心知戶大嫌甜酒才高笑小詩靜  
吟乘月夜閒醉曠花時還有愁同處春風滿鬢絲

代人贈王貞外

好在王貞外平生記得不共賒黃叟酒同上莫愁樓靜  
接殷勤語狂隨爛漫遊那知今日眼相見冷於秋

玉真張觀主下小女冠阿容

綽約小天仙生來十六年姑山半峰雪瑤水一枝蓮晚  
院花留立春窓月伴眠迴眸雖欲語阿母在傍邊

訪陳二

曉垂朱綬帶晚著白綸巾出去為朝客歸來是野人兩

殮聊過日一榻足容身此外皆閒事時時訪老陳

晚庭逐涼

送客出門後移牀下砌初趁涼行繞竹引睡卧看書老  
更為官拙慵多向事疎松窓倚藤杖人道似僧居

夜泊旅望

少睡多愁客中宵起望鄉沙明連浦月帆白滿船霜近  
海江彌濶迎秋夜更長煙波三十宿猶未到錢塘

郡樓夜晏留客

北客來相訪東樓為一開卷簾待月出把火看潮來艷  
聽竹枝曲香傳蓮子杯寒天殊未曉歸騎且遲迴

哀病

老與病相仍華簪髮不勝行多朝散藥睡少夜停燈祿  
食分供鶴朝衣減施僧性多移不得郡政漫如繩

小歲日對酒唸錢湖州所寄詩

獨酌無多興閒吟有所思一杯新歲酒兩句故人詩楊  
柳初黃日髭鬚半白時蹉跎春氣味彼此老心知

湖亭晚歸

盡日湖亭卧心閒事亦稀起因殘醉醒坐待晚涼歸  
松雨飄藤帽江風透葛衣柳堤行不厭沙軟絮霏霏

閒卧

一作賈島詩

盡日前軒卧神閒境亦空有山當枕上無事到心中  
簾卷侵牀日屏遮入座風望春春未到應在海門東

病中書事

三載卧山城閒知接物情鶯多過春語蟬不待秋鳴氣

嗽因寒發風痰欲雨生病身無所用惟解卜陰晴

臨池閒卧

小竹圍庭匝平池與砌連閒多臨水坐老愛向陽眠營  
役拋身外幽竒送枕前誰家卧牀脚解繫釣魚船

寄皇甫七

孟夏愛吾廬陶潛語不虛花樽飄落酒風案展開書隣  
女偷新果家僮漉小魚不知皇甫七池上興何如

重詠



日覺雙眸暗年驚兩鬢蒼病應無處避老更不宜忙徇  
俗心情少休官道理長今秋歸去定何必重思量

武丘寺路

去年重開寺路桃李  
蓮荷約種二千株

自開山寺路水陸往來頻銀勒牽驕馬花船載麗人  
菱荷生欲遍桃李種仍新好住湖堤上長留一道春

河亭晴望

風轉雲頭斂煙銷水面開晴虹橋影出秋雁櫓聲來  
郡靜官初罷鄉遙信未迴明朝是重九誰勸菊花杯

望亭驛酬別周判官

何事出長洲連宵飲不休醒應難作別歡漸少於愁燈  
火穿村市笙歌上驛樓何言五十里已不屬蘇州

聽琵琶妓彈略略

腕軟撥頭輕新教略略成四弦千遍語一曲萬重情法  
向師邊得能從意上生莫欺江外手別是一家聲

閒出

身外無羈束心中少是非被花留便住逢酒醉方歸人

事行時少官曹入日稀春寒遊正好穩馬薄綿衣

宴散

小宴追涼散平橋步月回笙歌歸院落燈火下樓臺殘  
暑蟬催盡新秋雁帶來將何迎睡興臨臥舉殘杯

人定

人定月朧明香消枕簟清翠屏遮燭影紅袖下簾聲坐  
久吟方罷眠初夢未成誰家教鸚鵡故語相驚

賦得烏夜啼

城上歸時晚庭前宿處危月明無葉樹霜滑有風枝啼  
澁饑喉咽飛低凍翅垂畫堂鸚鵡鳥冷暖不相知

和春深二十首

何處春深好春深富貴家馬為中路鳥妓作後庭花羅  
綺驅論隊金銀用短車眼前何所苦惟苦日西斜

何處春深好春深貧賤家荒涼三徑草冷落四隣花奴  
困歸慵力妻愁出賃車途窮平路險舉足劇褒斜

何處春深好春深執政家鳳池添硯水雞樹落花詔

借當衢宅恩容上殿車延英開對久門與日西斜

何處春深好春深方鎮家通犀排帶胯瑞鶴勘袍花飛  
絮衝毬馬垂楊拂妓車戎裝拜春設左握寶刀斜

何處春深好春深刺史家陰繁棠布葉岐秀麥分花五  
疋鳴珂馬雙輪畫軾車和風引行樂葉葉隼旗斜

何處春深好春深學士家鳳書裁五色馬鬣剪三花蠟  
炬開明火銀臺賜物車相逢不敢揖彼此帽低斜

何處春深好春深女學家慣看溫室樹飽識浴堂花御

印提隨仗香牋把下車  
宋家宮樣髻一片綠雲斜

何處春深好春深御史家  
絮縈驄馬尾蝶繞繡衣花  
破柱行持斧埋輪立駐車  
入班遙認得魚貫一行斜

何處春深好春深遷客家  
一杯寒食酒萬里故園花  
炎瘴蒸如火光陰走似車  
為憂鵬鳥至只恐日光斜

何處春深好春深經業家  
惟求太常第不管曲江花  
折桂名慙郤收螢志慕車  
官場泥鋪處最怕寸陰斜

何處春深好春深隱士家  
野衣裁薜葉山飯曬松花  
蘭

索紉幽佩蒲輪駐軟車林間箕踞坐白眼向人斜

何處春深好春深漁父家松灣隨棹月桃浦落船花投  
餌移輕楫牽輪轉小車蕭蕭蘆葉裏風起釣絲斜

何處春深好春深潮戶家濤翻三月雪浪噴四時花曳  
練馳千馬驚雷走萬車餘波落何處江轉富陽斜

何處春深好春深痛飲家十分杯裏物五色眼前花鋪  
歡眠糟甕流涎見麴車中山一沈醉千度日西斜

何處春深好春深上已家蘭亭席上酒曲洛岸邊花弄

水遊童棹湔裙小婦車齊橈爭渡處一匹錦標斜

何處春深好春深寒食家玲瓏鏤雞子宛轉綵毬花碧  
草追遊騎紅塵拜掃車鞦韆細腰語搖曳逐風斜

何處春深好春深博奕家一先爭破眼六聚鬪成花鼓  
應投壺馬兵衝象戲車彈碁局上事最妙是長斜

何處春深好春深嫁女家紫排襦上雉黃貼鬢邊花轉  
燭初移障鳴環欲上車青衣傳氈褥錦繡一條斜

何處春深好春深娶婦家兩行籠裏燭一樹扇間花寶



拜登華席親迎幃  
車催粧詩未了星斗漸傾斜  
何處春深好春深妓女家  
眉欺楊柳葉裙妬石榴花  
蘭麝熏行被金銅釘坐車  
杭州蘇小小人道最天斜

憶夢得

齒髮各蹉跎疎慵與病和  
愛花心在否見酒興如何  
年長風情少官高俗慮多  
幾時紅燭下聞唱竹枝歌

勸酒十四首

并序

子分秩東都居多暇  
日間來輒飲醉後輒吟苦

無詞章不成謠詠每發一意則成一篇凡十四  
篇皆主於酒聊以自勸故以何處難忘酒不如  
來飲酒命篇

何處難忘酒七首

何處難忘酒長安喜氣新初登高第後乍作好官人省  
壁明張榜朝衣穩稱身此時無一盞爭奈帝城春

何處難忘酒天涯話舊情青雲俱不達白髮遞相驚二  
十年前別三千里外行此時無一盞何以叙平生

何處難忘酒朱門羨少年春分花發後寒食月明前  
小院迴羅綺深房理管絃此時無一盞爭過艷陽天

何處難忘酒霜庭老病翁閣聲啼蟋蟀乾葉落梧桐鬢  
為愁先白顏因醉暫紅此時無一盞何計奈秋風

何處難忘酒軍功第一高還鄉隨露布半路授旌旄玉  
柱剝葱手金章爛椹袍此時無一盞何以騁雄豪

何處難忘酒青門送別多斂襟收涕淚簇馬聽笙歌煙  
樹灞陵岸風塵長樂坡此時無一盞爭奈去留何

何處難忘酒逐臣歸故園赦書逢驛騎賀客出都門半  
面瘴煙色滿衫鄉淚痕此時無一盞何物可招魂

不如來飲酒七首

莫隱深山去君應到自嫌齒傷朝水冷貌苦夜霜嚴漁  
去風生浦樵歸雪滿巘不如來飲酒相對醉厭厭

莫作農夫去君應見自愁迎春犁瘦地趁晚餽羸牛數  
被官加稅稀逢歲有秋不如來飲酒相伴醉悠悠

莫作商人去恓惶君未諳雪霜行塞北風水宿江南藏

鏹百千萬沈舟十二三不如來飲酒仰面醉酣酣

莫事長征去辛勤難具論何曾畫麟閣祇是老轅門  
蟻蝨衣中物刀鎗面上痕不如來飲酒合眼醉昏昏

莫學長生去仙方悞殺君那將薤上露擬待鶴邊雲  
砧砧皆燒藥纍纍盡作墳不如來飲酒閒坐醉醺醺

莫上青雲去青雲足愛憎自賢誇智慧相糾鬪功能魚  
爛緣吞餌蛾焦爲撲燈不如來飲酒任性醉騰騰

莫入紅塵去令人心力勞相爭兩蝸角所得一牛毛且

滅嗔中火休磨笑裏刀不如來飲酒穩卧醉陶陶

即事

見月連宵坐聞風盡日眠室香羅藥氣籠煖焙茶煙鶴  
啄新晴地雞棲薄暮天自看淘酒米倚杖小池前

西風

西風來幾日一葉已先飛新霽乘輕屐初涼換熟衣淺  
渠銷慢水疎竹漏斜暉薄暮青苔巷家僮引鶴歸

和夢得冬日晨興

漏傳初五點雞報第三聲帳下從容起窓間矐矐呼骨切  
明照書燈未滅煖酒火重生理曲絃歌動先聞唱渭城

把酒思閒事

把酒思閒事春愁誰最深乞錢羈客面落第舉人心月  
下低眉立燈前抱膝吟憑君勸一醉勝與萬黃金

把酒思閒事春嬌何處多試鞍新白馬弄鏡小青蛾掌  
上初教舞花前欲按歌憑君勸一醉勸了問如何

營閒事

自笑營間事從朝到日斜  
澆畦引泉脈掃徑避蘭芽  
暖  
變牆衣色晴催木筆花  
桃根知酒渴晚送一甌茶

感春

老思不禁春風光照眼  
新花房紅鳥嘴池浪碧  
魚鱗倚  
棹誰為伴持杯自問身  
心情多少在六十二三人

閒卧

薄食當齋戒散班同隱淪  
佛容為弟子天許作閒人  
惟  
置牀臨水都無物近身  
清風散髮後兼不要紗巾



訓思黯戲贈

同用狂字

鐘乳三千兩金釵十二行妬他心似火欺我鬢如霜思

黯

自誇前後服鐘乳三千兩甚得力而歌舞之妓頗多來詩戲余羸老故戲答之慰老資歌笑銷

愁仰酒漿眼看狂不得狂得且須狂

### 自題酒庫

野鶴一辭籠虛舟長任風送愁還鬧處移老入閒中身

更求何事天將富此翁此翁何處富酒庫不曾空

劉仁軌詩

云天將富此翁以一醉為富也

雨後秋涼

夜來秋雨後秋氣颯然新團扇先辭手生衣不著身更  
添砧引思難與簟相親此境誰偏覺貧閒老瘦人

問諸親友

七十人難到過三更較稀占花租野寺定酒典朝衣趁  
醉春多出貪歡夜未歸不知親故口道我是耶非

代書詩一百韻寄微之

憶在貞元歲初登典校司身名同日授心事一言知  
元貞

中與微之同登科第俱授  
秘書省校書郎始相識也  
肺腑都無隔形骸兩不羈踈

狂屬年少閒散為官卑分定金蘭契言通藥石規交賢

方汲汲友直每惔惔有月多同賞無杯不共持秋風拂

琴匣夜月卷書帷高上慈恩塔幽尋皇子陂唐昌玉蕊

會崇敬牡丹期唐昌觀玉蕊崇敬寺牡丹花時多與微之有期笑勸迂辛酒閒

吟短李詩辛大立度性迂嗜酒李二十紳體短能詩故當時有迂辛短李之號儒風愛敦

質佛理賞玄師劉三十二敦質有儒風庾度七玄師談佛理有可賞者度日曾無悶

通宵靡不為雙聲聯律句八面對宮棋雙聲聯句八面宮棋皆當時事

往往遊三省騰騰出九達寒銷直城路春到曲江池樹  
暖枝條弱山晴彩翠竒峰攢石綠點柳宛麴塵絲岍草  
煙鋪地園花雪壓枝早光紅照耀新溜碧逶迤幄幕侵  
堤布盤筵占地施徵伶皆絕藝選妓悉名姬粉黛凝春

態金鈿耀水嬉風流誇墜髻時世鬪啼眉

貞元中城中復為墜馬髻

啼眉粧也密坐隨歡促華樽逐勝移香飄歌袂動醉落舞釵

遺籌挿紅螺椀觥飛白玉卮打嫌調笑易飲迂卷波遲

拋打曲有調笑令飲酒曲有卷白波殘席誼譁散歸鞍酌酊騎馱顏烏帽

側醉袖玉鞭垂紫陌傳鐘鼓紅塵塞路歧幾時曾暫別  
何處不相隨荏苒星霜換迴環節候催兩衙多請假三

考欲成資運偶千年聖天成萬物宜皆當少壯日同惜

盛明時光景嗟虛擲雲霄竊闇窺攻文朝矻矻講學夜

孜孜策目穿如札時與微之集策略之目其數百十鋒毫銳若錐時與微之

各有鐵鋒細管筆攜以就試相顧輒笑目為毫錐繁張獲鳥網堅守釣魚坻謂自

冬至夏頻改試期竟與微之堅守制試也並受夔龍薦齊陳晁董詞萬言經

濟略三策太平基中第爭無敵專場戰不疲輔車排勝

陣犄角塞降旗

並謂同鋪席共筆硯

雙闕紛容衛千條儼等衰

謂制

舉人欲唱第時

恩隨紫泥降名向白麻披既在高科選還從好

爵縻東垣君諫諍西邑我驅馳

元和元年同登制科微之拜拾遺余授監厓尉

再喜登烏府多慙侍赤墀

四年微之復拜監察予為拾遺學士也

官班分

內外遊處遂參差每列鶴鸞序偏瞻獬豸姿簡威寒凜

冽衣彩繡葳蕤正色摧強禦剛腸嫉喔咻嘗憎持祿位

不擬保妻兒養勇當除惡輸忠在滅私下鞫驚燕雀當

道攝狐狸南國人無怨東臺吏不欺

微之使東原奏寬八十餘家詔從而

平之因分理寬多定國切諫甚辛毘造次行於是平生  
司東都

志在茲道將心共直言與行兼危水閣波翻覆山藏路  
險巖未為明主識已被倖臣疑木秀遭風折蘭芳遇霰  
萎千鈞勢易壓一柱力難支騰口因成瘡吹毛遂得疵  
憂來吟貝錦謫去詠江離邂逅塵中遇殷勤馬上辭賈  
生離魏闕王粲向荆夷水過清源寺山經綺季祠心搖  
漢隼珮淚隨峴亭碑

並途中  
經歷處

驛路緣雲際城樓枕水湄

思鄉多繞澤望闕獨登陴林晚青蕭索江平綠渺瀰野

秋鳴蟋蟀沙冷聚鷓鴣官舍黃茅屋人家苦竹籬白醪

充夜酌紅粟備晨炊寡鶴摧風翻鰈魚失水鬢鬢離啼

渴旦涼葉墜相思

此四句兼含  
微之鰈居

一點寒燈滅三聲曉角

吹藍衫經雨故驄馬卧霜羸念涸誰濡沫嫌醒自歎醜

耳垂無伯樂舌在有張儀負氣衝星劍傾心向日葵金

言自銷鑠玉性肯磷緇伸屈須看蠖窮通莫問龜定知

身是患當用道為醫想子今如彼嗟予獨在斯無慘當

歲杪有夢到天涯坐阻連襟帶行乖接履綦潤銷衣上



霧香散室中芝念遠緣遷貶驚時為別離素書三往復

明月七盈虧

自與微之別經七月三度得書

舊理非難到餘歡不可追

樹依興善老草傍靜安哀

微之宅在靜安坊西近興善寺

前事思如昨

中懷寫向誰北村尋古柏南宅訪辛夷

開元西北院即隋時龍村佛堂

有古柏一枝微之宅中有辛夷兩樹常與微之遊息其下

此日空搔首何人共解頤

病多知夜永年長覺秋悲不飲長如醉加飡亦似饑狂吟一千字因使寄微之

題王曹故宅

宅在檀溪

甲第何年置朱門此地開山當賓閣出溪繞妓堂迴覆  
井桐新長蔭窓竹舊栽池荒紅菌苔砌老綠莓苔捐館  
梁王去思人楚客來西園飛蓋處依舊月徘徊

渭邨退居寄禮部崔侍郎翰林錢舍人詩一百韻  
聖代元和歲閒居渭水陽不才甘命舛多幸遇時康朝  
野分倫序賢愚定否臧重文疎卜式尚少棄馮唐由是  
推天運從茲樂性場籠禽放高翥霧豹得深藏世慮休  
相擾身謀且自強猶須務衣食未免事農桑雜草通三

徑開田占一坊晝扉扃白版夜碓掃黃梁隙地治塲圃  
閒時糞土疆枳籬編刺夾薤壟擘科秧穡力嫌身病農  
心願歲穰朝衣典杯酒佩劍博牛羊困倚栽松鍾饑提  
採蕨筐引泉來後澗移竹下前岡生計雖勤苦家資甚  
渺茫塵埃常滿甌錢帛少盈囊弟病仍扶杖妻愁不出  
房傳衣念襁褓舉案笑糟糠犬吠村胥鬧蟬鳴織婦忙  
納租看縣帖輸粟問軍倉夕歇攀村樹秋行遶野塘雲  
容陰慘澹月色冷悠揚蕎麥鋪花白棠梨間葉黃早寒

風撼撼新霽月蒼蒼園菜迎霜死庭蕪過雨荒簷空愁  
宿燕壁閣思啼螿眼為看書損肱因運甓傷病骸渾似  
木老鬢欲成霜少睡知年長端憂覺夜長舊遊多廢忘  
往事偶思量忽憶煙霄路常陪劍履行登朝思檢束入  
閣學趨蹌命偶風雲會恩覃雨露霑枯發枝葉磨鈍  
起鋒鋌崔閣連鑣騫錢兄接翼翔齊竽混韶夏燕石廁  
琳琅同日升金馬分宵直未央共調加寵命合表謝恩  
光廐馬驕初跨天厨味始嘗朝晡頒餅餌寒暑賜衣裳

對秉鵝毛筆，俱含雞舌香。青縑衾薄絮，朱裏幕高張。畫  
食恒連案，宵眠每共牀。差肩承詔旨，連署進封章。起草  
偏同視，疑文最共詳。滅私容點竄，窮理析毫芒。便共輸  
肝膽，何曾異肺腸。慎微參石奮，決密學張湯。禁闈青交  
瑣，宮垣紫界牆。井欄排菡萏，簷瓦鬪鴛鴦。樓額題鷓鴣，  
池心浴鳳凰。風枝萬年動，溫樹四時芳。宿露凝金掌，晨  
暉上壁璫。砌筠塗綠粉，庭果滴紅漿。曉從朝興慶，春陪  
宴柏梁。傳呼鞭索索，拜舞佩鏘鏘。仙仗還雙闕，神兵闢

兩廂火翻紅尾旆，冰卓白竿鎗。澗瀆經魚藻，深沈近浴堂。  
分庭皆命婦，對面即儲皇。賈主冠浮動，親王轡鬧裝。  
金鈿相照耀，朱紫間熒煌。毬簇桃花綺，歌巡竹葉觴。窪  
銀中貴帶，昂黛內人粧。賜襪東城下，頒醕曲水傍。樽壘  
分聖酒，妓樂借仙娼。淺酌看紅藥，徐吟把綠楊。宴迴過  
御陌，行歇入僧房。白鹿原東郭，青龍寺北廊。望春花景  
暖，避暑竹風涼。下直閒如社，尋芳醉似狂。有時還後到，  
無處不相將。雞鶴初雖雜，蕭蘭久乃彰。來燕隗貴重，去

魯孔恓惶聚散期難定飛沈勢不常五年同晝夜一別  
似參商屈折孤生竹銷摧百鍊鋼途窮任憔悴道在肯  
徬徨尚念遺簪折仍憐病雀瘡卹寒分賜帛救餒減餘  
糧藥物來盈裹書題寄滿箱殷勤翰林主珍重禮闈郎  
煦沫誠多謝搏扶豈所望提攜勞氣力吹簸不飛揚拙  
劣才何用龍鍾分自當粧嫫徒費黛磨甌丁力切詎成  
璋習隱將時背千名與道妨外身宗老氏齊物學蒙莊  
疎放遺千慮愚蒙守一方樂天無怨歎倚命不動勸憤

憑胸須豁交加臂莫攘珠沈猶是寶金躍未為祥泥尾  
休搖掉灰心罷激昂漸閒親道友因病事醫王息亂歸  
禪定存神入坐亡斷癡求慧劍濟苦得慈航不動為吾  
志無何是我鄉可憐身與世從此兩相忘

題盧秘書夏日新栽竹二十韻

湘竹初封植盧生此考槃久持霜節苦新託露根難等  
度須當砌踈稠要滿欄買憐分薄俸栽稱作閒官葉剪  
藍羅碎莖抽玉瑄端幾聲清浙瀝一簇綠檀欒未夜青



嵐入先秋白露團  
拂肩搖翡翠  
慰手弄琅玕  
韻透窓風起  
陰鋪砌月殘  
炎天聞覺冷  
窄地見疑寬  
梢動勝搖扇  
枝低好掛冠  
碧籠煙霧霧  
珠灑雨珊珊  
晚籜晴雲展  
陰芽蟄虺蟠  
愛從抽馬策  
惜未截魚竿  
松韻徒煩聽  
桃夭不足觀  
梁慙當室杏  
臺陋本司蘭

古詩云盧家蘭室杏為梁又秘書府即蘭

臺也撐撥詩人興  
勾牽酒客歡  
靜連蘆簟滑  
涼拂葛衣單

豈止消時暑  
應能保歲寒  
莫同凡草木  
一種夏中看

題周皓大夫新亭子二十二韻

東道常為主南亭別待賓規模何日創景致一時新廣  
砌羅紅藥疎窓蔭綠筠鎖開賓閣曉梯上妓樓春置醴  
寧三爵加籩過八珍茶香飄紫筍膾縷落紅鱗輝赫車  
輿鬧珍奇鳥獸馴獼猴看檻馬鸚鵡喚家人錦額簾高  
捲銀花盞慢巡勸嘗光祿酒許看洛川神周蕪光祿卿  
有家妓數十  
人斂翠凝歌黛流香動舞巾裙翻繡瀾瀾梳陷鈿麒麟  
笛怨音含楚箏嬌語帶秦侍兒催畫燭醉客吐文茵投  
轄多連夜鳴珂便達晨入朝紆紫綬待漏擁朱輪貴介

交三事光榮照四隣  
甘濃將奉客穩暖不緣身  
十載歌鐘地三朝節鉞臣  
愛才心倜儻敦舊禮殷勤門以招賢  
盛家因好事貧始知豪傑意富貴為交親

東南行一百韻寄通州元九侍御澧州李十一舍  
人果州崔二十二使君開州韋大貲外廬三十  
二補闕杜十四拾遺李二十助教負外竇七校

書

南去經三楚東來過五湖  
山頭看候館水面問征途地

遠窮江界天低極海隅飄零同落葉浩蕩似乘桴漸覺  
鄉原異深知土產殊夷音語嘲晰蠻態笑睢盱水市通  
闌闌煙邨混舳艫吏徵魚戶稅人納火田租亥日饒鰕  
螯寅年足虎貍成人男作州似鬼女為巫樓閣攢倡婦  
隄喧簇販夫夜船論鋪賃春酒斷瓠沽見果多盧橘聞  
禽悉鷓鴣山歌猿獨叫野哭鳥相呼嶺徼雲成棧江郊  
水當郭月移翹柱鶴風汎颭檣烏鼈礙潮無信蛟驚浪  
不虞鼉鳴泉窟室蜃結氣浮圖樹裂山魃穴沙含水弩

樞喘牛犁紫芋羸馬放青菰繡面誰家婢鵝頭幾歲奴  
泥中採菱芡燒後拾樵蘇鼎膩愁烹鼈盤腥厭膾鱸鍾  
儀徒戀楚張翰浪思吳氣序涼還熱光陰旦復晡身方  
逐萍梗年欲近桑榆渭北田園廢江西歲月徂憶歸恒  
慘澹懷舊忽踟躕自念咸秦客嘗為鄒魯儒蘊藏經國  
術輕棄度關繻賦力凌鸚鵡詞鋒敵輓轡戰文重掉鞅  
射策一彎弧崔杜鞭齊下元韋轡並驅名聲逼楊馬交  
分過蕭朱世務輕摩揣周行竊覲鯢風雲皆會合雨露

各霑濡共偶昇平代偏慙固陋軀承明連夜直建禮拂  
晨趨美服頌王府珍羞降御厨議高通白虎諫切伏青  
蒲柏殿行陪晏花樓走看酺神旗張鳥獸天籟動笙竽  
丸劍星芒耀魚龍電策驅定場排漢旅促坐進吳歛縹  
緲疑仙樂嬋娟勝畫圖歌鬟低翠羽舞汗墮紅珠別選  
閒遊伴潛招小飲徒一杯愁已破三盞氣彌麤軟美仇  
家酒幽閒葛氏姝十千方得斗二八正當壚論笑杓胡  
肆談憐輦嘒嘒李酣猶短竇庾醉更雋迂鞍馬呼教住

骰盆喝遣輸長驅波卷白連擲采成盧

骰盆卷白波莫走鞍馬皆當時

酒令籌併頻逃席觥嚴列置盃滿卮那可灌顏王不勝扶

入視中樞草歸乘內廐駒醉曾衝宰相驕不揖金吾日

近恩雖重雲高勢却孤翻身落霄漢失脚倒泥塗博望

移門籍潯陽佐郡符

子自太子贊善大夫出為江州司馬

時情變寒暑世

利算錙銖即日辭雙闕明朝別九衢播遷分郡國次第出

京都

十年春徵之移佐通州其年秋予出佐潯陽明年冬杓直出牧澧州崔二十二出牧果州韋大出牧

開秦嶺馳三驛商山上二邗

商山險道中峴陽亭寂寞有東西二邗

夏口路崎嶇大道全生棘中丁盡執及江關未徹警淮

口尚稽誅

時淮西未平路經襄郡二州界所見如此

林對東西寺山分大小

姑

東林西林寺在廬山北大姑小姑在廬山南彭蠡湖中

廬峯蓮刻削湓浦帶縈

紆

蓮花峯在廬山北湓水在江城南何

九派吞青草

潯陽

在九派南通湖

孤城覆綠蕪

南方城壁多以草覆

黃昏鐘寂寂清曉

角鳴鳴春色辭門柳秋聲到井梧殘芳悲鴉鳩暮節感

茱萸蕊拆金英菊花飄雪片蘆波紅日斜沒沙白月平

鋪幾見林抽笋頻驚燕引雛歲華何儵忽年少不須更



眇默思千古蒼茫想八區孔窮緣底事顏夭有何辜龍  
智猶經醞龜靈未免刻窮通應已定聖哲不能逾况我  
身謀拙逢他厄運拘漂流隨大海鉅鍛任洪爐險阻嘗  
之矣栖遲命也夫沈冥消意氣窮餓耗肌膚防瘡和殘  
藥迎寒補舊襦書牀鳴蟋蟀琴匣網蜘蛛貧室如懸磬  
端憂劇守株時遭人指點數被鬼揶揄兀兀都疑夢昏  
昏半是愚女驚朝不起妻怪夜長吁萬里拋朋侶三年  
隔友于自然悲聚散不是恨榮枯去夏微之瘡今春席

八殂天涯書達否泉下哭知無

去年間元九瘧書去竟未報今春聞席八殂久

與還往能無慟哭

漫寫詩盈卷空盛酒滿壺只添新悵望豈復

舊歡娛壯志因愁減衰容與病俱相逢應不識滿領白

鬣鬚

霖雨苦多江湖暴漲塊然獨望因題北亭

自作潯陽客無如苦雨何陰昏晴日少閒悶睡時多湖  
濶將天合雲低與水和籬根舟子語巷口釣人歌霧島  
沈黃氣風帆斲白波門前車馬道一宿變江湖

春末夏初閒遊江郭

閒出乘輕屐徐行踏軟沙觀魚傍湓浦看竹入楊家

湓浦

多魚浦西有楊林迸穿籬笋藤飄落水花雨埋釣舟小

侍郎宅多好竹

風颺酒旗斜嫩剥青菱角濃煎白茗茶淹留不知夕城樹欲栖鴟

柳影繁初合鶯聲澁漸稀早梅迎夏結殘絮送春飛西日韶光盡南風暑氣微展張新小簟熨貼舊生衣綠蟻杯香嫩紅絲繪縷肥故園無此味何必苦思歸

寄蘄州篔簹與元九因題六韻

時元九  
鰥居

笛竹出蘄春霜刀劈翠筠織成雙鎖篔簹寄與獨眠人  
卷作筒中布舒為席上珍滑如鋪薤葉冷似卧龍鱗清潤  
宜乘露鮮華不受塵通州交瘴地此物最關身

潯陽秋懷贈許明府

霜紅二林葉風白九江波暝色投煙鳥秋聲帶雨荷馬  
閒無處出門冷少人過鹵莽還鄉夢依稀望闕歌共思  
除醉外無計奈愁何試問陶家酒新筍得幾多

題郡中荔枝詩十八韻兼寄楊萬州八使君

奇果標南土芳林對北堂素華春漠漠丹實夏煌煌葉  
捧低垂戶枝擎重壓牆始因風弄色漸與日爭光夕訝  
條懸火朝驚樹點粧深於紅躑躅大校白檳榔星綴連  
心朶珠排耀眼房紫羅裁襯殼白玉裹填瓢早歲曾聞  
說今朝始摘嘗嚼疑天上味嗅異世間香潤勝蓮生水  
鮮逾橘得霜臙脂掌中顥甘露舌頭漿物少猶珍重天  
高苦渺茫已教生暑月又使阻遐方粹液靈難駐妍姿

嫩易傷近南光景熱向北道途長不得充王賦無由寄  
帝鄉惟君堪擲贈面白似潘郎

發白狗峽次黃牛峽登高寺却望忠州

白狗次黃牛灘如竹節稠路穿天地險人續古今愁忽  
見千花塔因停一葉舟畏途長迫促靜境暫淹留巴曲  
春全盡巫陽雨半收北歸雖引領南望亦迴頭昔去悲  
殊俗今來念舊遊別僧山北寺拋竹水西樓郡樹花如  
雪軍厨酒似油時時大開口自笑憶忠州

送客南遷

我說南中事君應不願聽曾經身困苦不覺語丁寧燒  
處愁雲夢波時憶洞庭春畚煙勃勃秋瘴霧冥冥蚊蚋  
經冬活魚龍欲雨腥水蟲能射影山鬼解藏形穴掉巴  
蛇尾林飄鳩鳥翎颶風千里黑蕺徐廡切  
山菜也草四時青客  
似驚弦鴈舟如委浪萍誰人勸言笑何計慰漂零慎勿  
琴離膝長須酒滿瓶大都從此去宜醉不宜醒

新昌新居書事四十韻因寄元郎中張博士

冒寵已三遷歸朝始二年囊中貯餘俸園外買閒田狐  
兔同三徑蒿萊共一壥新園聊剗穢舊屋且扶顛簷漏  
移傾瓦梁欹換蠹椽平治遶臺路整頓近階甃巷狹開  
容駕牆低壘過肩門閭堪駐蓋堂室可鋪筵丹鳳樓當  
後青龍寺在前市街塵不到宮樹影相連省吏嫌坊遠  
豪家笑地偏敢勞賓客訪或望子孫傳不覓他人愛惟  
將自性便等閒栽樹木隨分占風煙逸致因心得幽期  
遇境牽松聲疑澗底草色勝河邊虛潤氷銷地晴和日



出天苔行滑如簟莎坐軟於綿簾每當山卷帷多待月  
褰籬東花掩映窓北竹嬋娟迹慕青門隱名慙紫禁仙  
假歸思晚沐朝去戀春眠拙薄才無取疎慵職不專題  
牆書命筆沽酒率分錢柏杵春靈藥銅瓶漱暖泉爐香  
穿蓋散籠燭隔紗然陳室何曾掃陶琴不要絃屏除俗  
事盡養活道情全尚有妻孥累猶為組綬纏終須拋爵  
祿漸擬斷腥羶大抵宗莊叟私心事些乾浮榮水割字  
真諦火生蓮梵部經十二玄書字五千是非多付夢語

默不妨禪博士官猶冷郎中病已痊多同僻處住久結  
靜中緣緩步攜筇杖徐吟展蜀牋老宜閒語話悶憶好  
書篇蠻榼來方瀉蒙茶到始煎無辭數相見鬢髮各蒼  
然

重到江州感舊遊題郡樓十一韻

掌綸知是忝剖竹信為榮才薄官仍重恩深責尚輕昔  
徵從典午今出自承明鳳詔休揮翰漁歌欲濯纓還乘  
小艘牒却到古湓城醉客臨江待禪僧出郭迎青山滿

眼在白髮半頭生又校三年老何曾一事成重過蕭寺  
宿再上庾樓行雲水新秋思閭閣舊日情郡民猶認得  
司馬詠詩聲

題別遺愛草堂兼呈李十使君

李亦廬山人  
常隱白鹿洞

曾住爐峰下書堂對藥臺斬新蘿徑合依舊竹窓開砌  
水親開決池荷手自栽五年方暫至一宿又須回縱未  
長歸得猶勝不到來君家白鹿洞聞道亦生苔

初到郡齋寄錢湖州李蘇州

聊取二郡一哂  
故有落句之戲

俱來滄海郡半作白頭翁漫道風煙接何曾笑語同吏

稀秋稅畢客散晚亭空霽後當樓月潮來滿座風雪名水

在吳興溪殊冷僻茂苑太繁雄唯此錢塘郡閒忙恰得中

對酒自勉

五十江城守停杯一自思頭仍未盡白官亦不全卑榮  
寵尋過分歡娛已校遲肺傷雖怕酒心健尚誇詩夜舞  
吳娘袖春歌蠻子詞猶堪三五歲相伴醉花時

早春西湖閒遊悵然興懷憶與微之同賞因思在

越官重事殷鏡湖之遊或恐未暇偶成十八韻

寄微之

上馬復呼賓湖邊景氣新管絃三數事騎從十餘人立  
換登山屐行攜漉酒巾逢花看當妓遇草坐為茵西日  
籠黃柳東風蕩白蘋小橋裝雁齒輕浪斲魚鱗畫舫牽  
徐轉銀船酌慢巡野情遺世累醉態任天真彼此年將  
老平生分最親高天從所願遠地得為隣雲樹分三驛  
煙波限一津翻嗟寸步隔却厭尺書頻浙右稱雄鎮山

陰委重臣貴隨長紫綬榮駕大朱輪出動刀槍隊歸生  
道路塵雁驚弓易散鷗怕鼓難馴百吏瞻相面千夫捧  
擁身自然閒興少應負鏡湖春

留題天竺靈隱兩寺

在郡六百日入山十二回宿因月桂落醉為海榴開

天竺

嘗有月中桂子落靈  
隱多海石榴花也

黃紙除書到青宮詔命催僧徒多

張望賓從亦徘徊寺閣煙埋竹林香雨落梅別橋憐白  
石辭洞戀青苔

石橋在天竺  
明洞在靈隱漸出松間路猶飛馬上杯

誰教冷泉水送我下山來

洛下寓居

秋館清涼日書因解悶看夜窓幽獨處琴不為人彈遊  
宴慵多廢趨朝老漸難禪僧教斷酒道士勸休官渭曲  
莊猶在錢塘俸尚殘如能便歸去亦不至饑寒

秋寄微之十二韻

娃館松江北稽城浙水東屈君為長吏伴我作衰翁旌  
旆知非遠煙雲望不通忙多對酒榼興少閱詩筒

比在杭州

兩浙留和詩贈答  
于筒中遞往來

淡白秋來日疎涼雨後風餘霞數片

綺新月一張弓影滿哀桐樹香凋晚蕙叢  
饑啼舂穀鳥寒怨絡絲蟲覽鏡頭雖白聽歌耳未聾  
老愁從此遣醉笑與誰同清旦方堆案黃昏始退公  
可憐朝暮景銷在兩衙中

夜歸

逐勝移朝宴留歡放晚衙賓寮多謝客騎從半吳娃到  
處銷春景歸時及月華城陰一道直燭焰兩行斜東吹



先催柳南霜不殺花  
臯橋夜沽酒燈火是誰家

齊雲樓晚望偶題十韻兼呈馮侍御周殷二協律

樓在蘇州

潦倒官僚盡蕭條  
芳歲闌欲辭南國去  
重上北城看複  
疊江山壯平鋪井邑寬  
人稠過揚府坊闌半長安  
挿霧峰頭没穿霞  
日脚殘水光紅漾漾  
樹色綠漫漫約畧留  
遺愛殷勤念舊歡  
病拋官職易老別  
友朋難九月全無  
熱西風亦未寒  
齊雲樓北面半日凭欄干

憶洛中所居

忽憶東都宅春來事宛然雪銷行徑裏水上卧房前厭  
綠栽黃竹嫌紅種白蓮醉教鷺送酒閒遣鶴看船幸是  
林園主慙為食祿牽宦情薄似紙鄉思急如弦豈合姑  
蘇守歸休更待年

有小白馬乘馭多時奉使東行至稠桑驛溘然而  
斃足可驚傷不能忘情題二十韻

能馱復能馳翩翩白馬兒毛寒一團雪鬃薄萬條絲皂

蓋春行日驪駒曉促時雙旌前獨步五馬內偏騎芳草  
承蹄葉垂楊拂頂枝跨將迎好客惜不換妖姬慢鞚遊  
蕭寺閒驅醉習池睡來乘作夢興發倚成詩鞭為馴難  
下鞍綠穩不離北歸還共到東使亦相隨赭白何曾變  
玄黃豈得知嘶風覺聲急蹋雪怪行遲昨夜猶芻秣今  
朝尚繫維卧槽應不起顧主遂長辭塵滅駸駸迹霜留  
皎皎姿度關形未改過隙影難追念倍燕求駿情深項  
別驩銀收鉤臆帶金卸絡頭羈何處理竒骨誰家覓弊

惟稠桑驛門外吟罷涕雙垂

和微之春日投簡陽明洞天五十韻

青陽行已半白日坐將徂越國強仍大稽城高且孤利  
饒鹽煮海名勝水澄湖牛斗天垂象台明地展圖

天台四明

二瓌竒填市井佳麗溢闔閭勾踐遺風霸西施舊俗姝  
船頭龍天矯橋脚獸睢盱鄉味珍螭蚓時鮮貴鷓鴣語  
言諸夏異衣服一方殊搗練蛾眉婢鳴榔蝸角奴江清  
敵伊洛山翠勝荆巫華表雙棲鶴聯檣幾點烏煙波分

渡口雲樹接城隅，澗遠松如畫。洲平水似鋪，綠科秧早  
稻紫笋折新蘆。暖踏泥中藕，香尋石上蒲。雨來萌盡達  
雷後，蟄全蘇。柳眼黃絲，類花房絳。螭珠林風新竹折，野  
燒老桑枯，帶蕲長枝蕙。錢穿短貫，榆暄和生野菜，卑濕  
長街蕪。女浣紗相伴兒烹鯉，一呼山魈啼稚子，林狖挂  
山都。產業論蠶蟻，孳生計鴨雛。泉岩雪飄灑，苔壁錦漫  
糊。堰限舟航路，堤通車馬途。耶溪岼回合，禹廟徑盤紆。  
洞穴何因鑿，星槎誰與劄。石凹仙藥白，峰峭佛香爐。去

為投金簡來因挈玉壺貴仍招客宿健未要人扶聞望  
賢丞相儀形美丈夫前驅駐旌旆偏坐列筵芋刺史旗  
翻隼尚書履曳鳧學禪超後有觀妙造虛無髻裏傳僧  
寶環中得道樞登樓詩八詠置硯賦三都捧擁羅將綺  
趨蹌紫與朱廟謨藏稷高兵畧貯孫吳令下三軍整風  
高四海趨千家得慈母六郡事嚴姑重士過三哺輕財  
抵一銖送觥歌宛轉嘲妓笑盧胡佐飲時炮鼈蠲醒數  
鱸醢醉鄉雖咫尺樂事亦須臾若不中賢聖何由外智

愚伊予一生志我爾百年軀江上三千里城中十二衢  
出多無伴侶歸只是妻孥白首青山約抽身去得無

想東遊五十韻

并序

大和三年春予病免官後憶遊浙右數郡兼思  
到越一訪微之故兩浙之間一物已上想皆在  
目吟且成篇不能自休盈五百字亦猶孫興公  
想天台山而賦之也

海內時無事江南歲有秋生民皆樂業地主盡賢侯郊

靜銷戎馬城高逼斗牛平河七百里沃壤二三州

自常及杭

凡七坐有湖山趣行無風浪憂食寧忘解纜寢不廢乘

流泉石譜天竺煙霞識虎丘

天竺虎丘寺領郡時舊遊最熟處

餘芳認

蘭澤遺詠思蘋洲

古詩云蘭澤多芳草又柳惲詩云汀洲採白蘋

菡萏紅塗粉

菰蒲綠潑油鱗差漁戶舍綺錯稻田溝紫洞藏仙窟

泉貯怪湫精神昂老鶴姿彩媚潛蚪

大謝詩云潛蚪媚幽姿

靜閱

天工妙閒窺物狀幽投竿出比目擲果下獼猴味苦蓮

心小漿甜蔗節稠橘苞從自結藕孔是誰鏤逐日移潮



信隨風變棹謳遞夫交烈火候吏次鳴騶梵塔形疑踊

重元閣

閭門勢欲浮

吳閭門

客迎攜酒榼僧待置茶甌小宴

閒談笑初筵雅獻酬稍催朱蠟炬徐動碧玉籌圓盃飛  
蓮子長裾曳石榴柘枝隨畫鼓調笑從香毳幕颺雲飄  
檻簾褰月露鉤舞繁紅袖去歌切翠眉愁絃管寧容歇  
杯盤未許收良辰宜酌酊卒歲好優游鰕縷鮮仍細蓴  
絲滑且柔飽餐為日計穩睡是身謀名愧空虛得官知  
止足休自嫌猶屑屑衆笑太悠悠物表疎形役人寰足

悔尤蛾須遠燈燭鬼勿近置果幻世春來夢浮生水上  
漚百憂中莫入一醉外何求未死癡王湛無兒老鄧攸  
蜀琴安膝上周易在牀頭去去無程客行行不繫舟勞  
君頻問訊勸我少淹留自此後並屬微之雲雨多分散關山苦

阻修一吟江月別七見日星周

昔在杭州別微之微之留詩云明朝又向江頭

別月落湖珠玉傳新什鷓鴣念故儔懸旌心宛轉東楚

平是去時意綢繆驛舫粧青雀官槽餗紫駟鏡湖期遠汎禹穴約

冥搜預掃題詩壁先開望海樓飲思親履舄宿憶並衾

稠志氣吾哀也風情子在不應須相見後別作一家遊  
吾哀子在  
並出家語

箏

雲髻飄蕭綠花顏旖旎紅雙眸剪秋水十指剝春葱楚  
艷為門閨秦聲是女工甲鳴銀玦柱觸玉玲瓏猿苦  
啼嫌月鸞嬌語訛風移愁來手底送恨入絃中趙瑟清  
相似胡琴鬧不同慢彈迴斷鴈急奏轉飛蓬霜珮鏘還  
委冰泉咽復通珠聯千拍碎刀截一聲終倚麗精神定

矜能意態融歇時情不斷休去思無窮燈下青春夜樽  
前白首翁且聽應得在老耳未多聾

翫半開花贈皇甫郎中

八年寒食日池東小樓上作

勿訝春來晚無嫌花發遲人憐全盛日我愛半開時紫  
蠟粘為蒂紅酥點作蕤成都新夾纈梁漢碎胭脂樹杪  
真珠顆牆頭小女兒淺深粧駁落高下火參差蝶戲爭  
香朶鶯啼選穩枝好教郎作伴合共酒相隨醉翫無勝  
此狂嘲更讓誰猶殘少年興未是老人詩西日憑輕照

東風莫殺吹明朝應爛漫後夜更離披林下遙相憶樽  
前閣有期銜杯嚼蕊思唯我與君知

楊柳枝二十韻

楊柳枝洛下新聲也洛之小妓有善歌之者詞章音韻聽可動人故

賦之

小妓攜桃葉新歌蹋柳枝粧成剪燭後醉起拂衫時繡  
履嬌行緩花筵笑上遲身輕委迴雪羅薄透凝脂笙引  
簧頻煖箏催柱數移樂童翻怨調才子與妍詞便想人  
如樹先將髮比絲風條搖兩帶煙葉貼雙眉口動櫻桃

破鬟低翡翠垂枝柔腰媚娜萋嫩手葳蕤唳鶴晴呼侶  
哀猿夜叫兒玉敲音歷歷珠貫字縈縈袖為收聲點釵  
因赴節遺重重遍頭別一一拍心知塞北愁攀折江南  
苦別離黃遮金谷岸綠映杏園池春惜芳華好秋憐顏  
色衰取來歌裏唱勝向笛中吹曲罷那能別情多不自  
持纏頭無別物一首斷腸詩

詠老贈夢得

與君俱老也自問老何如眼溢夜先睡頭慵朝未梳有

時扶杖出盡日閉門居懶照新磨鏡休看小字書情於  
故人重跡共少年疎惟是閒談興相逢尚有餘

分司洛中多暇數與諸客宴遊醉後狂吟偶成十  
韻因招夢得賓客兼呈思黯竒章公

性與時相遠身將世兩忘寄名朝士籍寓興少年場老  
豈無談笑貧猶有酒漿隨時求伴侶逐日用風光數數  
遊何爽此些病未妨天教榮啟樂人恕接輿狂改業為  
逋客移家住醉鄉不論招夢得兼擬誘竒章要路風波

險權門市井忙世間無可戀不是不思量

閒居自題戲招宿客

水畔竹林邊閒居二十年健常攜酒出病即掩門眠解  
綬收朝珮褰裳出野船屏除身外物擺落世間緣報曙  
窓何早知秋簟最先微風深樹裏斜日小樓前渠口添  
新石籬根寫亂泉欲招同宿客誰解愛潺湲

西亭牆下  
泉石有聲

醉中得上都親友書以予停俸多時憂問負乏偶

乘酒興詠而報之




頭白醉昏昏狂歌秋復春一生耽酒客五度棄官人

蘇州

刺史刑部侍郎河南尹同州刺史太子少傅皆以病免也異世陶元亮前生劉伯倫

卧將琴作枕行以錘隨身歲要衣三對年支穀一困園  
葵烹佐飯秋葉掃添薪没齒甘蔬食搖頭謝縉紳自能  
拋爵祿終不惱交親但得杯中滌從生甑上塵煩君問  
生計憂醒不憂貧



御定全唐詩錄卷六十三